

Honrando un visionario y pionero

A desvela Henny Eman Boulevard



DIA 6 di januari 2025, Aruba a despedi di Aruba su prome Minister President sr. Henny Eman. Awe riba e mesun fecha, pero un año despues, Gabinete AVP-Futuro, riba peticion di Stichting Henny Eman, a honra un visionario grandi den politica di Aruba nombrando un di e careteranan principal di Aruba na su nomber.

Awe parti di e caminda conoci pa decada como L.G. Smith Boulevard cu ta inicia na e rotonde di Mahuma te cu e rotonde di Sun Plaza, ta bira oficialmente Henny Eman Boulevard. E caya largo aki ta pasa dilanti di Aeropuerto Internacional Reina Beatrix, dilanti di Parlamento di Aruba y e oficina principal di Gobierno di Aruba y conecta cu e area di turistico principal cu tabata parti di e vision di Henny Eman.

Durante di e atardi di e desvelo, tambe a tuma luga un ceremonia den cual ehecutivonan di Aeropuerto Reina Beatrix a compañía Prome Minister Mike Eman y Minister Wendrick Cicilia plantando dos mata di Wayacá Macho riba e “berm” net pabao di e rotonde di aeropuerto como parti di e plan nacional di reforestacion “Sembra Speransa”. Hunto cu e desvelo di nomber di Henny Eman Boulevard, ta honra nos liderazgo y duna balor na nos biodiversidad y futuro.

Minister mr. Wendrick Cicilia a remarca di ta un momento pa celebra y honra e gigantenan y lidernan cu a cana hunto cu nos. *“Porta di shelo ta habri pa hende homber y muhe cu ta dedica na pais; nos sa cu minister-president Henny Eman, Nos MinPres, Nos Henny Eman! Awe ta mira for di shelo y sumamente contento”* Minister Cicilia a remarca tambe den

su discurso diferente vision y logronan cu Aruba su prome Prome Minister a logra.

Presidente di Stichting Henny Eman, sr. Tico Croes a hiba palabra diamars atardi tambe durante e desvelo di e borch di Henny Eman Boulevard. Sr. Croes a comparti cu tur presente cu no por lubida con Henny Eman a enfrenta varios reto den nos turismo. *“Henny a convence pueblo, pa den tres luna, pueblo haci un esfuerzo di bay un banco; entrega e Florin Antiano y busca un florin Arubiano”* Sr. Croes, cu tambe a fungi como minister den Gabinete Eman II y Eman III a cataloga esaki como un muestra con un lider ora e ta visionario, ora e por convece su comunidad cu e por cambia e motivacion individual pa motivacion y accion colectivo.

James Hepple, un experto den turismo na Aruba a repasa varios cifranan di nos turismo durante e ultimo decadanan *“Lidernan manera Henny Eman no ta maneha djis economia, pero nan ta re-imagina e intensidad di nos isla.”* Sr. Hepple a remarca pa nos sigui enfoca riba turismo y tuma tur accion necesario pa garantisar nos turismo sigui florece.

Minister-president mr. Mike Eman a comparti varios anecdotas durante e bahada di solo despues cu e desvela e borch di Henny Eman Boulevard. *“Awe si nos por disfruta di nos turismo ta Danki na Henny Eman su vision”* Henny Eman como prome minister a declara 30% di Aruba como parke nacional, asina visionero Henny Eman tabata no solamente den e aspecto economico pero tambe den e identidad di kico ta mara nos n’e suelanan aki.